


御定全唐詩錄

土岐文庫

文庫17

W65

29



五子集卷之九
方干

五子集卷之九
方干

010185189452

文庫 17
W 65
29



御定全唐詩錄卷第九十

禮部侍郎臣徐倬翰林院侍讀學士臣徐元正奉

旨校刊

方干

干字雄飛新定人

干父名肅工詩母即詩人章八元女新定即今嚴郡浙東云干桐廬人

徐凝一

見器之授以詩律為人質野喜凌侮每見人設三拜曰禮數有三識之者呼為方三拜貌寢又免缺有司以故不與科名隱會稽之鏡湖及遇醫補唇已老矣因終身不出嘗謁姚合合意侮之覽詩卷為變容敬禮列郡湖州鄭仁規建州李頻九江陶祥並於干契分為浚初會稽守王龜欲薦干諫署

昭和六十年二月一日
土岐善吉唐氏寄贈

不果歿後宰臣張文蔚奏文人不第者十五人干
預其數追賜及第干律詩鍊句字字無失有高堅
峻拔之目自咸通得名迄文德江之南未有及者
後進私謚為元英先生
王贊序曰干之為詩鉅肌滌骨冰瑩霞絢嘉肴自
將不吮餘雋麗不葩粉苦不棘癯當其得志倏與
神會詞若未至意已獨逞先是丹陽有南陽張祐
差前干生其詩放言橫肆皆吳越之遺逸余嘗較
之張祐升杜甫之堂方干入錢起之室矣

近體詩

鏡中別業

寒山壓鏡心此處是家林
梁燕窺春醉岳猿學夜吟
雲連平地起月向白波沈
猶自聞鐘角樓身可在深
世人如不容吾自縱天慵
落葉憑風掃香杭倩水春花
朝連郭霧雪夜隔湖鐘身
外能無事頭宜白此峯

山中卽事

趨世非身事山中適性情
野花多異色幽鳥少凡聲
樹影搜涼臥苔光破碧行
閒尋採藥處仙路漸分明

過黃州作

弭節齊安郡孤城百戰殘
傍村林有虎帶郭縣無官
暮角梅花怨清江桂影寒
黍離緣底事撩我起長嘆
冬夜泊僧舍

江東寒近臘野寺水天昏無酒能消夜隨僧早閉門照
墻燈焰細着瓦雨聲繁漂泊仍千里清吟欲斷魂

東溪別業寄段郎中

前山含遠翠羅列在窓中盡日無人到一樽誰與同涼
隨蓮葉雨暑避柳條風豈分長岑寂明時有至公

寄石湓清越上人

寺處唯高僻雲生石枕前靜吟因得句獨夜不妨禪窗
接停猿樹岳飛洗鶴泉相思有書札俱倩獵人傳

送姚合負外赴金州

受詔從華省開旗發帝州野烟新驛曙殘照古山秋樹
勢連巴沒江聲入楚流唯應化行後吟句上閒樓

經周處士故居

愁吟與獨行何事不傷情久立釣魚處唯聞啼鳥聲山
蔬和草嫩海樹入籬生吾在茲溪上懷君恨不平

過朱協律故山

地下無餘恨人間得盛名殘篇續大雅稚子托諸生度
日山空暮綠溪鶴自鳴難收故交意寒笛一聲聲

山中言事

日與村家事漸同燒松啜茗學隣翁池塘月撼芙蓉浪
牕戶涼生薜荔風書幌晝昏嵐氣裏巢枝夜折雪聲中
山陰釣叟無知已窺鏡得多鬢欲空

欹枕亦吟行亦醉臥吟行醉更何營貧來猶有故琴在

老去不過新髮生山鳥踏枝紅果落家僮引釣白魚驚
潛夫自有孤雲侶可要王侯知姓名

鑑湖西島言事

慵拙幸便荒僻地縱聽猿鳥亦何愁偶斟藥酒欺梅雨
却着寒衣過麥秋歲計有時添橡實生涯一半在漁舟
世人若便無知己應向此溪成白頭

初歸鏡中寄陳端公

去歲離家今歲歸孤帆夢向鳥前飛必知蘆笋侵沙井
兼被藤花占石磯雲島採茶常失路雪龕中酒不關扉
故交若問逍遙事元冕何曾勝葦衣

湖北有茅齋湖西有松島輕棹往返頗諧素心因

成四韻

湖北湖西往復還朝昏只處自由間暑天移榻就溪竹
月夜乘舟歸淺山遶砌紫鱗欹枕釣垂簷野果隔窗攀
古賢暮齒方如此多笑愚儒鬢未斑

自縉雲赴郡溪流百里輕棹一發曾不崇朝叙事

四韻寄獻段郎中

激箭溪湍勢莫憑飄然一葉若為乘仰瞻青壁開天罅
斗轉寒灣避石稜巢鳥夜驚離島樹啼猿晝怯下岳藤
此中明日尋知己恐似龍門不易登

路入剡中作

截灣衝瀨片帆通高枕微吟到剡中掠草並飛憐燕子

停撓獨飲學漁翁波濤漫撼長潭月楊柳斜牽一岸風
便擬乘槎應去得仙源直恐接星東

睦州呂郎中郡中環溪亭

爲是仙才登望處風光便是武陵春閒花半落猶迷蝶
白鳥雙飛不避人樹影與餘侵枕簟荷香坐久着衣巾
暫來此地非多日明主那容借寇恂

題睦州郡中千峰榭

豈知平地似天台朱戶深沈別徑開曳響露蟬穿樹去
斜行沙鳥向池來窗中早月當琴榻牆上秋山入酒盃
何事此中如世外應緣羊祜是仙才

再題路支使南亭

行處避松兼礙石卽須門徑落斜開夢邀舊友看漁釣
貪聽新禽駐酒杯樹影不隨明月去溪聲常送落花來
睡時分得江淹夢五色毫端弄逸才

題越州袁秀才林亭

清邃林亭指畫開幽巖別派像天台坐牽蕉葉題詩句
醉觸藤花落酒杯白鳥不歸山裏去紅鱗多自鏡中來
終年此地爲吟侶早起尋君薄暮回

題桐廬謝逸人江居

清世高眠無一事五侯勳盛欲如何湖邊倚杖寒吟苦
石上橫琴夜醉多鳥自樹梢隨果落人從牕外卸帆過
由來朝市爲真隱可要棲身向薜蘿

旅次洋州寓居郝氏林亭

舉目縱然非我有思量似在故山時
鶴盤遠勢投孤嶼
蟬曳殘聲過別枝
涼月照窗欹枕倦
澄泉遶石泛觴遲
青雲未得平行去
夢到江南身旅羈

題法華寺絕頂禪家壁

蒼翠迢嶢逼宵冥
下方雷雨上方晴
飛流便向砌邊挂
片月影從窗外行
馴鹿不知誰結侶
野禽多是自呼名
只應禪者無來去
坐看千山白髮生

書法華寺上方禪壁

砌下松顛有鶴棲
孤猿亦在鶴邊啼
臥聞雷雨歸巖早
坐見星辰去地低
一徑穿綠應就郭
千花掩映似無溪

是非生死多憂惱
此日蒙師為破迷

題龍泉寺絕頂

未明先見海底日
良久遠雞方報晨
古樹含風長帶雨
寒巖四月始知春
中天氣爽星河近
下界時豐雷雨勻
前後登臨思無盡
年年改換去來人

題報恩寺上方

客來先上上方看
眼界無窮世界寬
岳溜噴空晴似雨
林蘿礙日夏多寒
衆山迢遞皆相疊
一路高低不記盤
清峭關心惜歸去
他時夢到亦難判

題寶林山禪院

山捧亭臺郭遶山
遙盤蒼翠到山巔
岳中古井雖通海

窟裏陰雲不上天羅列衆星依木末周迴萬室在簷前
我來可要歸禪老一寸寒灰已達禪

題澄聖塔院上方

地靈真是饒雲雨杉檜老於雲雨間只訝窗中常見海
方知砌下更多山遠泉勢曲猶須引野果枝低可要攀
若把重門諭元寂何妨善閉却無關

陪王大夫泛湖

去去凌晨迴見星木蘭舟穩畫橈輕白波潭上魚龍氣
紅樹林中雞犬聲密炬燒殘銀漢晏羽觴飛急玉山傾
此時檢點諸名士却是漁翁無姓名

和于中丞登扶風亭

避石攀蘿歸不迷行時舉步似丹梯東軒海日已先照
下界晨雞猶未啼郭裏雲山全占寺村前竹樹半藏溪
謝公吟望多來此此地應將峴首齊

陽亭言事獻漳州于使君

重疊山前對酒樽騰騰兀兀度朝昏平明疎磬白雲寺
遙夜孤砧紅葉村去鳥豈知煙樹遠驚魚應覺露荷翻
旅人寄食逢黃菊每見北辰思故園

郊山贈洪拾遺

聖代諫臣停諫舌求歸故里傲雲霞溪頭講樹纜漁艇
篋裏朝衣輸酒家但愛身閒辭祿俸那嫌歲計在桑麻
我來幸與諸生異問答時容近絳紗

贈處州段郎中

幸見仙才領郡初，郡城孤峭似山居。
杉蘿色裏遊亭榭，瀑布聲中閱簿書。
德重自將天子合，情高元與世人疎。
寒潭是處清連底，賓席何心望食魚。

贈山陰崔明府

用心何況兩衙間，退食孜孜亦不閒。
壓酒曬書猶檢點，修琴取藥似交關。
笙歌入夜舟中月，花木知春縣裏山。
平叔正堪湯餅試，風流不合問年顏。

賊退後贈劉將軍

非唯吳起與穰苴，今古推排盡不如。
白馬知無髀上肉，黃巾泣向箭頭書。
二年戰地成桑茗，千里荒榛作比閭。

功業更多身轉貴，佇看幢節引戎車。

贈華陰隱者

少微夜夜當仙掌，更有何人在此居。
花月舊應看浴鶴，松蘿本自伴刪書。
素琴醉去經宵枕，衰髮寒來向日梳。
故國多年歸未遂，因逢此地憶吾廬。

贈天台葉尊師

莫見平明離少室，須知薄暮入天台。
常時愛縮山川去，有夜自攜星月來。
靈藥不知何代得，古松應是長年栽。
先生暗笑看碁者，半局碁邊白髮催。

送孫百篇遊天台

東南雲路落斜行，入樹穿村見赤城。
遠近常時皆藥氣，

高低無處不泉聲映巖日向牀頭沒濕燭雲從柱底生
更有仙花與靈鳥恐君多半未知名

送鄭台處士歸絳巖

榮啓先生挾琴去厭尋靈勝憶岳棲白猿垂樹窗邊月
紅鯉驚鉤竹外溪慣採藥苗供野饌曾書蕉葉寄新題
古賢猶愴河梁別未可忽忽便解攜

許負外新陽別墅

蘭汀橘島映亭臺不是經心即手栽滿閣白雲隨雨去
一池寒月逐潮來小松出屋和巢長新徑通村避笋開
柳絮風前欹枕臥荷花香裏釣魚回園中認葉分靈草
簷下攀枝落野梅莫恣高情求逸思須防急詔用長才

若因螢火終殘卷便把漁歌送幾杯多謝郢中賢太守
常時譚笑許趨陪

衢州別李秀才

千山紅樹萬山雲把酒相看日又曛一曲離歌兩行淚
更知何處再逢君

與徐溫話別

去去何時却見君悠悠煙水似天津明年今夜有明月
不是今年看月人

李昌符

昌符字巖夢有詩名與張喬許棠輩同稱十哲咸
通四年登進士第歷膳部員外郎

北夢瑣言昌符久不第常歲卷軸怠於裝修因出一奇作婢僕詩五十首於公卿間行之浹旬京城盛傳是年登第與夫桃杖虛靴事雖不同用奇即無異也

近體詩

遠歸別墅

馬首曾行處連嘶渡晚河忽驚鄉樹出漸識路人多細徑穿禾黍頽垣壓薜蘿乍歸猶似客鄰叟亦相過

塞上行

朔野烟塵起天軍又舉戈陰風向晚急殺氣入秋多樹盡禽棲草冰堅路在河汾陽無繼者羗部官相和

旅遊傷春

酒醒鄉關遠迢迢聽漏終曙分林影外春盡雨聲中鳥思鄉村路花殘野岸風十年成底事羸馬倦西東

送人出塞

北風吹雨雪舉目已悽悽戰鬼秋頻哭征鴻夜不栖沙平關路直磧廣郡樓低此去非東魯人多事鼓鞳

來鵬

鵬豫章人詩思清麗韋尚書岫愛其才欲以女妻之而不果

近體詩

宛陵送李明府罷任歸江州

菊花村晚雁來天共把離杯向水邊官滿便尋垂釣侶
家貧已用賣琴錢浪生湓浦千層雪雲起爐峯一炷烟
儻見吾鄉舊知己為言憔悴過年年

清明日與友人遊玉粒塘莊

幾宿春山逐陸郎清明時節好風光歸穿綠荇船頭滑
醉踏殘花屐齒香風急嶺雲飄迥野雨餘田水落方塘
不堪吟罷東回首滿耳蛙聲正夕陽

王遵

遵宣城人登咸通七年進士第

撫言云遵與許棠同鄉幼為小吏棠應二十餘舉
遵猶在胥徒善為絕句詩然淡自晦密一旦辭役

就貢會棠送客至灞漥間遇遵於途訊曰何事至
京遵曰就貢棠怒曰小吏無禮後遵成名五年棠
始登第

近體詩

彭澤

鶴夢孤松雲夢山官情微祿免相關栽成五柳吟歸去
漉酒巾邊伴菊閒

長城

秦築長城比鐵牢蕃戎不敢過臨洮雖然萬里連雲際
爭及堯階三尺高

遵此詩得名於時何光遠以為集中無以加

胡曾

曾邵陽人咸通中舉進士不第嘗為漢南從事有
安定集十卷詠史詩三卷

近體詩

寒食都門作

二年寒食住京華寓目春風萬萬家
金絡馬銜原上草玉釵人折路傍花
軒車竟出紅塵外冠蓋爭回白日斜
誰念都門兩行淚故園寥落在長沙

贈薛濤

萬里橋邊女校書枇杷花下閉門居
掃眉才子知多少管領春風總不如

渭濱

岸草青青渭水流子牙曾此獨垂鈎
當時未入非熊兆幾向斜陽嘆白頭

流沙

七雄戈戟亂如麻四海無人得坐家
老氏却思天竺住便將徐甲去流沙

摩笄山

春草綿綿岱日低山邊立馬看摩笄
黃鶯也解追前事來向夫人死處啼

黃金臺

北乘羸馬到燕然此地何人復禮賢
欲問昭王無處所黃金臺上草連天

澗池

日照荒城芳草新
相如曾此挫強秦
能令百二山河主
便作樽前擊缶人

長平

長平瓦震武安初
趙卒俄成戲鼎魚
四十萬人俱下世
元戎何用讀兵書

易水

一旦秦王馬角生
燕丹歸此送荆卿
行人欲識無窮恨
聽取東流易水聲

云云亭

一上高亭日正晡
青山重疊片雲無
萬年松樹不知數

若箇蚪枝是大夫

居延

漠漠平沙際碧天
問人云此是居延
停驂一顧猶魂斷
蘇武爭禁十九年

李陵臺

北入單于萬里疆
五千兵敗滯窮荒
英雄不伏蠻夸死
更築高臺望故鄉

滹沱河

光武經營業未興
王郎兵革整憑陵
須知後漢功臣力
不及滹沱一片冰

銅雀臺

魏武龍興逐逝波高臺空按望陵歌過雲聲絕悲風起
翻向樽前泣翠娥

西園

月滿西園夜未央金風不動鄴天涼高情公子多秋興
更領詩人入醉鄉

金谷園

一自佳人墜玉樓繁華東逐洛河流惟餘金谷園中樹
殘日蟬聲送客愁

東山

五馬南浮一化龍謝安入相此山空不知攜妓重來日
幾樹鶯啼谷口風

武陵溪

一溪春水徹雲根流水桃花片片新若道長生是虛語
洞中爭得有秦人

金陵

侯景長驅十萬人可憐梁武坐蒙塵生前不得空王力
徒向金田自捨身

汴水

千里長河一旦開亡隋破浪九天來錦帆未落干戈起
惆悵龍舟更不迴

唐彥謙

彥謙字茂業晉陽人莒公儉之後博學多藝文詞

壯麗書畫音樂博飲之技無不出於流輩咸通末
應進士負才無所屈降十餘年不第乾符末避亂
漢南中和中河中王重榮辟為從事累表為副歷
晉絳二州刺史重榮軍亂貶漢中掾曹節度楊守
亮復署為判官累表為副歷閬壁二州刺史彥謙
詩尤工七言少師溫庭筠故體格類之有鹿門集
彥謙詩學溫李宋楊文公嗜其集手書自隨嘗謂
其得義山清峭感愴之一體
紀事云彥謙即陶穀之祖穀避晉祖嫌名改姓子
孫遂不易

近體詩

上已寄韓公

上已接寒食鶯花寥落晨微微潑火雨草草踏青人涼
似三秋景清無九陌塵與余同病者對此合傷神

漢代

漢代金為屋吳宮綺作寮艷詞傳靜婉新曲定妖嬈箭
響猶殘夢籤聲報早朝鮮明臨曉日迴轉度春宵半袖
籠清鏡前絲壓翠翹靜多如有待閒極似無慘梓澤花
猶滿靈和柳未凋障昏巫峽雨屏掩浙江潮未信潘名
岳應疑史姓蕭漏因歌暫斷燈為雨頻挑飲酒闌三雅
投壺賽百嬌鈿蟬新翅重金鴨舊香焦水淨疑澄練霞
孤欲建標別隨秦柱促愁為蜀絃么元晏難瘳痺臨邛

但發瘡聯詩微弱絮思友詠甘蕉王氏憐諸謝周郎定
小喬黼幃翹綵雉波扇画文鯨荇密妨垂釣荷歌欲渡
橋不因衣帶水誰覺路迢迢

七夕

露白風清夜向晨小星垂珮月埋輪絳河浪淺休相隔
滄海波深尚作塵天外鳳凰何寂寞世間烏鵲漫辛勤
倚蘭殿北斜樓上多少通宵不睡人

文惠宮人

認得前家令宮人淚滿裾不知梁佐命全是沈尚書

曲江春望

杏艷桃嬌奪晚霞樂遊無廟有年華漢朝冠蓋皆陵墓

十里宜春下苑花

仲山

漢高祖兄
仲山此

千載遺踪寄薜蘿沛中鄉里漢山河長陵亦是閒丘隴
異日誰知與仲多

桺

絆惹春風別有情世間誰敢鬪輕盈楚王江畔無端種
餓損宮腰學不成

高駢

駢字千里南平郡王崇文之孫家世禁衛折節為
文學與諸儒交懿宗朝歷秦州經畧安南都護鄆
州西川荆南節度觀察等使廣明之亂拜諸道兵

馬都統鎮揚州懷貳心擁兵自固好神仙信任呂
用之諸人政大亂為其將畢師鐸所殺
太平廣記云駢幼好為詩雅有奇藻屬情賦詠橫
絕常流時秉筆者多不及之故唐季言勲臣有文
者駢其首焉集遇亂多亡今其存者如言懷二女
廟咏雪聽歌竹杖多盛傳於世

近體詩

和王昭符進士贈洞庭趙先生

為愛君山景最靈
角冠秋禮一壇星
藥將雞犬雲間試
琴許魚龍月下聽
自要乘風隨羽客
誰同種玉驗仙經
烟霞寂寞無人到
惟有漁翁過洞庭

步虛詞

清谿道士人不識
上天下天鶴一隻
洞門深鎖碧窗寒
滴露研朱點周易

山亭夏日

綠樹陰濃夏日長
樓臺倒影入池塘
水晶簾動微風起
滿架薔薇一院香

邊方春興

草色青青柳色濃
玉壺傾酒滿金鍾
笙歌嘹亮隨風去
知盡關山第幾重

聞河中王鐸加都統

煉汞燒鉛四十年
至今猶在藥爐前
不知子晉緣何事

只學吹簫便得仙

春日招賓

花枝如火酒如錫正好狂歌醉復醒對酒看花何處好
延和閣下碧筠亭

廣陵宴次戲簡幙賓

一曲狂歌酒百分蛾眉畫出月爭新將軍醉罷無餘事
亂把花枝折贈人

渭川秋望寄右軍王特進

長川終日碧潺湲知道天河與地連憑寄兩行朝闕淚
願隨流入御溝泉

顧雲

雲字垂象池州人風韻詳整與杜荀鶴殷文圭友
善同肄業九華咸通十五年登進士第為高駢淮
南從事師鐸之亂退居雲川杜門著書執政薦脩
國史書成加虞部員外郎

北夢瑣言云雲齋賈之子與羅隱俱受知於令狐
相公子弟宴會每預風韻談諧莫辨其為寒素之
士

太平廣記大順中詔雲同羊昭業等十人修史謁
高逢休逢休為遺書劉僕射譏諸人擬將一尺三
寸汗脚踏他燒殘龍尾道懿宗皇帝雖薄德不任
被前件人羅織執大政者亦太悠悠雲私啓其函

吁嗟而已

古體詩

蘇君廳觀韓幹馬障歌

杜甫歌詩吟不足可憐曹霸丹青曲直言弟子韓幹馬
畫馬無骨但有肉今日披圖見筆跡始知甫也真凡目
秦王學士居武功六印名家聲價雄乃孫屈跡寧百里
好奇學古有祖風竹廳斜日奕碁散延我直入書齋中
屹然六幅古屏上歛見圍人牽入天廐之神龍麟鬣鳳
臆真相似秋竹慘慘披兩耳輕勻杏葉糝皮毛細撚銀
絲插鬃尾思量動步應千里誰見初離渥洼水眼前只
欠燕雪飛蹄下如聞朔風起朱崖謫掾從亡歿更有何

人鑒奇物當時若遇燕昭王肯把千金買枯骨

章碣

碣孝標之子登乾符進士第

近體詩

春別

擲下離觴指亂山趨程不待鳳笙殘花邊馬嚼金銜去
樓上人垂玉筍看柳陌雖然風裊裊葱河猶自雪漫漫
殷勤莫厭貂裘重恐犯三邊五月寒

送謝進士歸閩

百越風烟接巨鰲還鄉心壯不知勞雷霆入地建溪險
星斗逼人梨嶺高却擁木綿吟麗句便攀龍眼醉香醪

名場聲利喧喧在莫向林泉改鬢毛

焚書坑

竹帛烟銷帝業虛關河空鎖祖龍居坑灰未冷山東亂
劉項原來不讀書

崔塗

塗字禮山光啓進士

近體詩

夕次洛陽道中

秋風吹故城城下獨吟行高樹鳥已息古原人尚耕流
年川暗度往事月空明不復嘆岐路馬前塵夜生

蜀城春望

天涯憔悴身一望一沾巾在處有芳草滿城無故人懷
材皆得路失計獨傷春清鏡不忍照髻毛應更新

過陶徵君舊居

陶令曾居此弄琴遺世情田園三畝綠軒冕一銖輕衰
柳自無主白雲猶可耕不隨陵谷變應只有高名

孤雁

幾行歸塞盡念爾獨何之暮雨相呼失寒塘欲下遲渚
雲低暗渡關月冷相隨未必逢矰繳孤飛自可疑

春夕旅懷

水流花謝兩無情送盡東風過楚城蝴蝶夢中家萬里
杜鵑枝上月三更故園書動經年絕華髮春催兩鬢生

自是不歸歸便得五湖煙景有誰爭

鸚鵡洲春眺

悵望春襟鬱未開重臨鸚鵡益堪哀曹瞞尚不能容物
黃祖何因解愛才幽島暖聞燕雁去曉江晴覺蜀波來
誰人正得風濤便一點輕帆萬里回

讀庾信集

四朝十帝盡風流建業長安兩醉遊唯有一篇楊柳曲
江南江北為君愁

李郢

郢字楚望大中中進士第為藩鎮從事兼侍御史

古體詩

茶山貢焙歌

使君愛客情無已客在金臺價難比春風三月貢茶時
盡逐紅旌到山裏焙中清曉朱門開筐箱漸見新芽來
凌烟觸露不停採官家赤印連帖催朝饑幕畝誰興哀
喧闐競納不盈掬一時一餉還成堆蒸之馥之香勝梅
研膏架動轟如雷茶成拜表貢天子萬人爭啜春山摧
驛騎鞭聲若流電半夜驅夫誰復見十日王程路四千
到時須及清明宴吾君可謂納諫君諫官不諫何由聞
九重城裏雖旰食天涯吏役長紛紛使君憂民慘容色
就焙嘗茶坐諸客幾回到口重咨嗟嫩綠鮮芳出何力
山中有酒亦有歌樂營房戶皆仙家仙家十隊酒百斛

金絲宴饌隨經過使君是日憂思多客亦無言徵綺羅
殷勤繞焙復長嘆官府例成期如何吳民吳民莫憔悴
使君作相期蘇爾

近體詩

卽目

自笑騰騰者非愁又不狂何為跽似鼠而復怯於麀落
拓無生計伶俜戀酒鄉冥搜得詩窟偶戰出文場愛雪
愁冬盡懷人覺夜長石樓多爽氣檉案有餘香運去非
關拙時來不在忙平生兩閒暇孤趣滿滄浪

春晚題山家

偶與樵人熟春殘日日來依岡尋紫蕨挽樹得青梅燕

靜銜泥起蜂喧抱藥回嫩茶重攪綠新酒畧吹醅漠漠
蠶生紙涓涓水弄苔丁香正堪結留步小庭隈

江亭春霽

江籬漠漠荇田田江上雲亭霽景鮮蜀客帆檣背歸燕
楚山花木怨啼鶻春風掩映千門柳晚色淒寒萬井烟
金磬泠泠水南寺上方僧室翠微連

暮春山行田家歇馬

雨溼菰蒲斜日明茅廚煮蠶掉車聲青蛇上竹一種色
黃蝶隔溪無限情何處樵漁將遠餉故園田土憶春耕
千峰靄靄水滴滴羸馬此中愁獨行

江亭晚秋

碧天涼冷雁來疎閒看江雲思有餘秋館池亭荷葉歇
野人籬落豆花初無愁自得仙翁術多病能忘太史書
聞說故園香稻熟片帆歸去就鱸魚

送劉谷

村橋西路雪初晴雲暖沙乾馬足輕寒澗渡頭芳草色
新梅嶺外鷓鴣聲郵亭已送征車發山館誰將候火迎
落日千峰轉迢遞知君回首望高城

江上逢王將軍

虬鬚憔悴羽林郎曾入甘泉侍武皇
離沒夜雲知御苑馬隨春仗識天香
五湖歸去孤舟月六國平來兩鬢霜
唯有桓伊江上笛卧吹三弄送殘陽

鄭畋

畋字台文滎陽人會昌進士第美風儀神采如玉
文學優渥尤長於賦

近體詩

謁昇仙太子廟

在昔靈王子吹笙遡次寥六宮攀不住三島互相招
亡國原陵古賓天歲月遙無蹊窺海曲有廟訪山椒
石帳龍蛇拱雲樓彩翠銷露壇裝琬琰真像寫松喬
珠館青童宴琳宮阿母朝氣輿仙女侍天馬吏兵調
湘妓紅絲瑟秦郎白瑄簫西城邀綽約南嶽命嬌嬈
句曲觴金洞天台嘯石橋晚花珠弄藥春茹玉生苗
二景神光秘三

元寶籙饒霧垂鴉翅髮冰束虎章腰鶴馭爭銜箭龍妃
各獻綃衣從星渚浣丹就日宮燒物外花常滿人間葉
自凋望臺悲漢戾閱水笑梁昭古殿香殘地荒堦桺長
條幾曾期七日無復降重霄嵩嶺烜天漢伊瀾入海潮
何由得真訣使我珮環飄

御定全唐詩錄卷第九十

御定全唐詩錄卷第九十一

禮部侍郎臣徐倬翰林院侍讀學士臣徐元正奉

旨校刊

羅隱

隱字昭諫新登人本名橫十上不中第遂更名從
事湖南歷淮潤皆無合久之歸投錢鏐累官錢塘
令鎮海軍掌書記節度判官鹽鐵發運副使著作
佐郎奏授司勳郎梁祖以諫議大夫召不行魏博
羅紹威推為叔父表薦給事中年七十七終隱少
聰敏作詩文多以譏刺為主有甲乙詩集

紀事云隱初隱池之梅根浦自號江東生廣明中

池守竇橘營墅居之

隱為唐相鄭畋李蔚所知畋女覽其詩諷誦不已有慕才意隱貌寢陋女一日簾窺之自此絕不詠其詩

又紀事云隱虬鄴共場屋謂之三羅昭宗聞其名欲以甲科處之有大臣奏曰隱雖有才然多輕易明皇聖德猶橫遭乎譏謗將相臣僚豈能免乎凌轢帝問譏謗之詞對曰隱有華清詩曰樓殿層層佳氣多開元時節好笙歌也知道德勝堯舜爭奈楊妃解笑何其事遂寢

北夢瑣言云隱頗不得意頗怨望為貴遊子弟所

排契濶東歸黃冠事平朝賢議欲召之韋貽範沮之曰某與同舟而載未相識舟人告云此有朝官羅曰是何朝官我脚夾筆亦可敵得數輩必若登科通籍吾徒為糝糠也由是不果召

江南李氏嘗遣使聘越越人問見羅給事否使人曰不識亦不聞名越人云四海聞有羅江東何拙之甚使人曰為金榜上無名所以不知

古體詩

隴頭水

借問隴頭水年年恨何事全疑嗚咽聲中有征人淚自古無長策况我非深智何計謝潺湲一宵空不寐

江南行

江南濕雨鮫綃軟漠漠遠山眉黛淺水國多愁又有情
夜槽壓酒銀船滿細柳搖烟凝曉空吳王臺榭春夢中
鴛鴦鴻鴻喚不起平鋪綠水眠東風西陵路遠月悄悄
油壁車輕嫁蘇小

江南別

去年今夜江南別鴛鴦翅冷飛蓬熱今年今夜江北邊
鯉魚腸斷音書絕男兒心事無了時出門上馬不自知
酬丘光庭

正月十一日書札五月十六日到來柳吟秦望咫尺地
鯉魚何處閒徘徊故人情意未疎索次第序述眉眼開

上言二年隔烟水下有數幅真瓊瑰行吟坐讀口不倦
瀑泉激射琅玕摧壁池蘭蕙日已老村酒蘸甲時幾杯
鶴齡鴻算不復見雨後篔簹空莓苔自從黃寇擾中土
人心波蕩猶未迴道殷合眼拜九列張濬掉舌升三台
朝廷濟濟百揆序寧將對面容姦回禍生有基妖有漸
翠華西幸蒙塵埃三川梗塞兩河閉大明宮殿生蒿萊
懦夫早歲不量力策蹇仰北高崔嵬千門萬戶扃鎖密
良匠不肖雕散材君今得意尚如此况我麋鹿悠悠哉
榮衰貴賤目所覩莫嫌頭白黃金臺

近體詩

效玉臺體

青樓枕路隅壁甃復椒塗晚夢通簾押春寒逼酒壚解
吟憐芍藥難見恨菖蒲試問年多少鄰姬亦姓胡

春居

東風百卉搖舊國路迢迢偶病成疎散因貧得寂寥倚
簷高桺弱乘露小桃妖春色常無處村醪更一瓢

絕境

絕境非身事流年但物華水梳苔髮直風引蕙心斜凡
客從題鳳膚音未勝蛙小船兼有槳始與問漁家

秋晚

宰邑慚良術為文愧壯圖縱饒長委命爭奈漸非夫杯
酒有時有亂離無處無金庭在何處回首一踟躕

除夜

官曆行將盡村醪強自傾厭寒思暖律畏老惜殘更歲
月已如此寇戎猶未平兒童不諳事歌吹待天明

杜處士新居

翠斂王孫草荒誅宋玉茅寇餘無故物時薄少溪交迸
笋穿行逕饑雛出壞巢小園吾亦有多病近來拋

秋浦

晴川倚落暉極目思依依野色寒來淺人家亂後稀久
遊身不達多病意常違還有魚船在時時夢裏歸

早登新安縣樓

關城樹色齊往事未全迷塞路真人氣封門壯士泥草

濃延蝶舞花密教鶯啼若以鳴為德鸞凰不及雞

寄陸龜蒙

李相公蔚在淮南嘗徵其詩

龍樓李丞相簪歲仰高文黃閣尋無主青山竟未聞
夜船乘海月秋寺伴江雲却恐塵埃裏浮名點汙君

北固亭東望寄默師

高亭暮色中往事更誰同水漫矜天濶山應到此窮
病憐京口酒老怯海門風惟有言堪解何由見遠公

姑蘇真娘墓

春草荒墳墓萋萋向虎丘死猶嫌寂寞生肯不風流皎
鏡山泉冷輕裾海霧秋還應伴西子香逕夜深遊

菊

籬落歲云晏數枝聊自芳雪裁纖藥密金拆小苞香
千載白衣酒一生青女霜春叢莫輕薄彼此有行藏

燕

不必嫌漂露何妨養羽毛漢妃金屋遠盧女杏梁高
野迥雙飛急煙晴對語勞猶勝黃雀在棲息是蓬蒿

自貽

衰老應難更進趨藥畦經卷自朝晡縱無顯效亦藏拙
若有所成甘守株漢武巡遊虛軋軋秦皇吞併謾驅驅
如何只見丁家鶴依舊遼東歎綠蕪

水邊偶題

野水無情去不回水邊花好為誰開祇知事逐眼前過

不覺老從頭上來窮似丘軻休歎息達如周召亦塵埃
思量此理何人會蒙邑先生最有才

西上

西上青雲未有期東浮滄海去何遲酒闌夢覺不稱意
花落月明空所思長恐病侵多事日可堪忙過少年時
鬪雞走狗五陵道惆悵輸他輕薄兒

關亭春望

關畔春雲拂馬頭馬前春事共悠悠風欺岸柳長條困
露浥山花小朶愁信越功名高似狗裴王氣力大於牛
未知至竟將何用渭水涇泥一向流

曲江春感

江頭日暖花又開江東行客心悠哉高陽酒徒半凋落
終南山色空崔嵬聖代也知無棄物侯門未必用非才
一船明月一竿竹家住五湖歸去來

東歸途中作

松橋蒼黃覆釣磯早年生計近年違老知風月終堪恨
貧覺家山不易歸別岸客帆和雁落晚程霜葉向人飛
買臣嚴助精靈在應笑無成一布衣

金陵夜泊

冷煙輕靄傷衰叢此夕秦淮駐斷蓬棲雁遠驚沽酒火
亂鴉高避落帆風地銷王氣波聲急山帶秋陰樹影空
六代精靈人不見思量應在月明中

早春巴陵道中

遠雪亭亭望未消
岳陽春淺自相饒
短蘆冒土初生笋
高柳偷風已弄條
波汎洞庭猶懶健
谷連荆楚鬼神妖
中流菱唱泊何處
一隻畫船蘭作橈

憶九華

九華巉崢廕柴扉
長憶前時此息機
黃菊倚風村酒熟
綠蒲低雨釣魚歸
干戈已是三年別
塵土那堪萬事違
回首佳期恨多少
夜闌霜露又沾衣

蓮塘驛

蓮塘館東初日明
蓮塘館西行人行
隔林啼鳥似相應
當路好花疑有情
一夢不須追往事
數杯猶可慰勞生

莫言來去只如此
君看鬢邊霜幾莖

登夏州城樓

寒聲獵獵戍旗風
獨倚危樓悵望中
萬里山河唐土地
千年魂魄晉英雄
離心不忍聽邊馬
往事應須問塞鴻
好脫儒冠從校尉
一枝長戟六鈞弓

春日獨遊禪智寺

遠樹連天水接空
幾年行樂舊隋宮
花開花謝長如此
人去人來自不同
鸞鳳調高何處酒
吳牛蹄健滿車風
思量只合騰騰醉
煮海平陳盡夢中

揚州開元寺閣上作

滿檻山川漾落暉
檻前前事去如飛
雲中雞犬劉安過

月裏笙歌煬帝歸江蹙海門帆散出地吞淮口樹相依
紅樓翠幕知多少長向東風有是非

覽晉史

張翰思吳中
鱸膾蓴羹

齊王僚屬好男兒偶覓東歸便得歸滿目路岐拋似夢
一船風雨去如飛盤擎紫線蓴初熟筋撥紅絲膾正肥
惆悵中途無限事與君千載兩忘機

題潤州妙善寺前石羊

相傳吳主孫權與蜀
主劉備嘗此置會

紫髯桑蓋此沉吟狼石猶存事可尋漢鼎未分聊把手
楚醪雖滿肯同心英雄已往時難問苔蘚何知日漸深
還有市鄽沽酒客鵲喧鳩聚話蹄涔

題籌筆驛

拋擲南陽為主憂北征東討盡良籌時來天地皆同力
運去英雄不自由千里山河輕孺子兩朝冠劍恨譙周
惟餘巖下多情水猶解年年傍驛流

春日登上元石頭城

萬里傷心極目春東南王氣只逡巡野花相笑落滿地
山鳥自憐啼傷人謾道城池須險阻可知豪傑亦埃塵
太平寺主惟輕薄却把三公與賊臣

清溪江令公宅

鸞牋象管夜深時曾賦陳宮第一詩讌罷風流人不見
廢來蹤跡草應知鶯憐勝事啼空谷蝶戀餘香舞好枝
還有往年金甃井牧童樵叟等閒窺

燕昭王墓

戰國蒼茫難重尋此中踪跡想知音強停別騎山花曉
欲弔遺魂野草深浮世近來輕駿骨高臺何處有黃金
思量郭隗平生事不殉昭王是負心

暇日投錢尚父

牛斗星邊女宿間棟梁虛敞麗江關望高漢相東西閣
名重淮王大小山醴設鬪傾金鑿落馬歸爭撼玉連環
自慙麋鹿無能事未報深恩鬢已斑

春日投錢塘元帥尚父

正憂衰老辱金臺敢望昭王顧問來門外旌旗屯虎豹
壁間章句動風雷三都節已聯翩降兩地花應次第開

若比紫髯分鼎足未聞餘力有瓊瓌

征東幕府十三州敢望非才忝上游官秩已叨吳品職
姓名兼顯魯春秋鹽車顧後聲方重火井窺來焰始浮
一句黃河千載事郢城王粲謾登樓

澄清日後代應難繼此才隱起而續末句云門外旌旗
屯虎豹壁間章句動風雷由是以紅紗罩覆其上

吳越備史云隱寢疾王親臨
撫問因題其壁云黃河信有

病中上錢尚父

左脚妨行右臂攣每慙名跡汗賓筵縱饒吳主容衰病
爭奈燕臺費料錢藜杖已乾難更把竹輦雖在不堪懸
深恩重德無言處回首浮生淚泫然

玉函瑤檢下台司記得當時捧領時半壁龍蛇蟠造化
滿筐山嶽動神祇疲牛舐犢心猶切陰鷄鳴雛力已衰

穉子不才身抱疾日窺真跡淚雙垂

寄前宣州竇常侍

往年西謁謝元暉尊酒畱歡醉始歸曲檻柳濃鶯未老
小園花暖蝶初飛噴香瑞獸金三尺舞雪佳人玉一圍
今日亂離尋不得滿蓑風雨釣魚磯

綿谷迴寄蔡氏昆仲

一年兩度錦江遊前值東風後值秋芳草有情皆礙馬
好雲無處不遮樓山將別恨和心斷水帶離聲入夢流
今日因君試回首澹煙喬木隔綿州

寄南城韋逸人

杜甫詩中韋曲花至今無賴尚家家美人曉折露沾袖

公子醉歸香滿車萬里丹青傳不得二年風雨恨無涯
羨他南澗高眠客春去春來任物華

夜泊毗陵無錫縣有寄

草蟲幽咽露初團獨繫孤舟夜已闌濁浪勢奔吳苑急
疎鐘聲出慧山寒愁催鬢髮凋何易貧戀家鄉別漸難
他日親朋應大笑始知書劍是無端

寄處默師

甘露捲簾看雨脚樟亭倚柱望潮頭十年顧我醉中過
兩地與師方外遊久隔兵戈長寄夢近無書信更堪憂
香爐煙靄虎溪月終棹鐵船尋惠休

送宿松傅少府

江籬漠漠樹重重東過清淮到宿松縣好也知臨皖水
官閒應得看瀟峯春生綠野吳歌怨雪霽平郊楚酒濃
畱取餘杯待張翰明年歸棹一從容

送張綰遊鍾陵

南憶龍沙兩岸行當時天下尚清平醉眠野寺花方落
吟倚江樓月欲明老去亦知難重到亂來爭官不牽情
西山十二真人在從此煩君話姓名

早春送處士張坤歸汴州

蕭蕭羸馬正塵埃又送歸軒向吹臺別酒莫辭今夜醉
故人知是幾時來泉經華嶽猶應凍花到梁園始合開
為謝東門抱關吏不堪惆悵滿離杯

篋中得故王郎中書

鳳里前年別望郎叮嚀唯恐滯吳鄉勸疎杯酒知妨事
乞與書題作裹糧革鹿未能移海曲縣花尋已落河陽
九原自此無因見反覆遺踪淚萬行

中秋月

湖上風高動白蘋暫延清景此逡巡隔年為別因何事
半夜相看似故人蟾向靜中矜爪距兔佯明處弄精神
姮娥老大應惆悵獨倚蒼蒼桂一輪

梅花

吳王醉處十餘里照夜拂衣今正繁經雨不隨山鳥散
倚風如共路人言愁憐粉艷飄歌席靜愛寒香撲酒樽

欲寄所思無好信為君惆悵又黃昏

杏花

暖觸衣襟漠漠香間梅遮柳不勝芳數枝艷拂文君酒
半里紅欹宋玉墻盡日無人疑悵望有時經雨乍淒涼
舊山山下還如此迴首東風一斷腸

牡丹

似共東風別有因絳羅高捲不勝春若教解語應傾國
任是無情亦動人芍藥與君為近侍芙蓉何處避芳塵
可憐韓令功成後辜負穠華過此身藝苑雌黃云元和中韓弘罷
宣武歸長安命斷去第中牡
丹曰吾豈効兒女輩耶北夢瑣言云隱與周繇分深繇謂隱曰閣下有女郭子
詩極為絕唱隱不喻何為曰若教解語能傾國任是無情也動人隱撫掌大笑
贈妓雲英

鍾陵醉別十餘春重見雲英掌上身我未成名君未嫁

可能俱是不如人

鑑戒錄云鍾陵妓雲英隱與舊下第見
之雲英曰羅秀才當尚未脫白隱贈詩

感弄猴人賜朱紋

十二三年就試期五湖煙月奈相違何如學取孫供奉

一笑君王便著緋

幕府燕閒錄云唐昭宗播遷隨駕伎藝人止有弄猴者
猴頗馴能隨班起居昭宗賜以緋袍號孫供奉故羅隱

有詩云朱梁篡位取此猴令殿下起居猴望殿陛見全
忠徑趨其所跳躍奮擊遂令殺之唐臣愧此猴多矣

題蟠溪垂釣圖

呂望當年展廟謨直鈞釣國更誰如若教生在西湖上

也是須供使宅魚

錢氏有國西湖漁者日納魚數斤
謂之使宅魚隱題此圖遂蠲其徵

七夕

月帳星房次第開兩情惟恐曙光催時人不用穿針待

沒得心情送巧來

小松

已有清陰逼坐隅，愛聲仙客宿過無。陵遷谷變須高節，

莫向人間作大夫。

困學紀聞云：昭諫咏松云：其志亦可悲矣。唐六臣彼何人哉！昭諫說錢鏐舉兵討梁，其忠義可見。視奴事朱

溫之杜荀鶴猶冀土也

柳

灞岸晴來送別頻，相偎相倚不勝春。自家飛絮猶無定，爭把長條絆得人。

題新榜

黃土原邊狡兔肥，犬如流電馬如飛。灞陵老將無功業，猶憶當時夜獵歸。

鄭谷

谷字若愚，袁州人。故永州刺史之子。幼年司空圖與刺史同院，見而奇之，曰：「會吟得丈丈詩，否曰吟得莫有病，否曰丈丈曲。」江晚望斷篇云：「村南斜日閒回首，一對鴛鴦落渡頭。即深意矣。」司空嘆惜，撫背曰：「當為一代風騷主。」乾寧中為都官郎中。谷詩名盛於唐末，人多傳諷號為鄭都官，而弗名也。谷自序曰：「谷勤苦風雅，騎竹之年，即有賦咏。同年古川守李公朋同官馬博士戴嘗撫頂歎勉，謂他日必垂名及冠，求試春闈。歷干大匠，故少師相國太原公深推獎之。故薛許昌能、李建州頻不以晚

輩見待預於唱和之流所得為多登第之後孜孜
忘倦甚於始學喪亂奔離散墜畧盡乾寧初上幸
三峯寓止雲臺道舍拾墜補遺編成三百首分為
三卷目之為雲臺編所不能自負初心非敢矜於
作者

紀事曰咸通中谷與張喬許棠諸人同有詩名稱
十哲

近體詩

潼關道中

白道曉霜迷籬燈照馬嘶秋風滿關樹殘月隔河雞來
往非無倦窮通豈易齊何年歸故社披雨剪春畦

旅寓洛南村舍

村落清明近鞦韆稚女誇春陰妨柳絮月黑見梨花白
鳥窺魚網青帘認酒家幽棲雖自適交友在京華

登杭州城

漠漠江天外登臨返照間潮來無別浦木落見他山沙
鳥晴飛遠漁人夜唱閒歲窮歸未得心逐片帆還

潯陽姚宰廳作

縣幽公事稀庭草是山薇足得招棊侶何妨著道衣野
泉當案落浴鷺入衙飛寺去東林近多應隔宿歸

書村叟壁

草肥朝牧牛桑綠晚鳴鳩列岫簷前見清泉碓下流春

蔬和雨割社酒向花笏引我南陂去籬邊有小舟

張谷田舍

縣官清且儉溪谷有人家一徑入寒竹小橋穿野花
喧春澗滿梯倚綠桑斜自說年來稔前村酒可賒

梁燭處士辭金陵相國杜公歸舊山因以寄贈

相庭畱不得江野有苔磯兩浙尋山遍孤舟載鶴歸
世間書讀盡雲外客來稀諫署搜賢急應難惜布衣

久不得張喬消息有寄

天末去程孤沿淮復向吳亂離何處甚安穩到家無樹
盡雲垂野檣稀月滿湖傷心遶村路應少舊耕夫

夕陽

夕陽秋更好澌澌蕙蘭中極浦明殘雨長天急遠鴻
僧窗畱半榻漁舸透疎篷莫恨清光盡寒蟾卽照空

趙璘郎中席上賦蝴蝶

尋艷復尋香似閒還似忙煖烟沉蕙徑微雨宿花房
書幌輕隨夢歌樓悞採妝王孫深屬意繡入舞衣裳

乖慵

乖慵居竹裡涼冷卧池東一霎芰荷雨幾迴簾幙風
遠僧來叩寂小吏笑書空衰髯霜供白愁顏酒借紅
扇輕搖鷺羽屏古画漁翁自得無端趣琴棊舫子中

迴鑿

妖星沉雨露和氣滿京關上將忠勳立明君法駕還
順

風調雅樂夾道叙群班香泛傳宣裏塵清指顧間樓臺
新紫氣雲物舊黃山曉渭行朝肅秋郊曠望閒廟靈安
國步日角動天顏浩浩昇平曲流歌徹百蠻

故少師從翁隱巖別墅亂後榛蕪感舊愴懷遂有

追紀鄭薰歸老號所居為隱巖

風騷為主人凡俗仰清塵密行稱閨闈明誠動縉紳周
旋居顯重內外掌絲綸妙主蓬壺籍忠為社稷臣大儀
墻仞峻東轄紀綱新聞善常開口推公豈為身立朝鳴
珮重歸宅典衣貧半醉看花晚中冷煮菜春晴臺隨鹿
上幽墅結僧鄰理論知清越清越江左詩僧孤卿待之甚厚生徒得李頻藥
香沾筆研竹色染衣巾寄鶴眠雲叟騎驢入室賓咸通中舉子乘

馬唯張喬跨驢喬詩苦道真孤卿延之門下

近將姚監比

自姚秘監合主張風雅後孤卿一人而已

僻與段卿

親段少常成式與學辛勤章句入微孤卿為前序

葉積池邊路茶遲雪後薪所難留著

述誰不秉陶鈞喪亂時多變追思事已陳浮華重發作

雅正甚湮淪宗從今何在依棲素有因七松無影響孤卿

植小松七本自號七松處士異代對五柳先生班即孤卿姪孫登進士科級也

闕下春日

建昌宮殿紫雲飄春漏遲遲下絳霄綺陌暖風嘶去馬
粉廊初日照趨朝花經宿雨香難拾鶯在豪家語更嬌
秦楚年年有離別揚鞭揮袖灞陵橋

自貽

飲筵博席與心違野眺春吟更自誰琴有澗風聲轉澹
詩無僧字格還卑方回云谷詩多用僧字凡四十餘處恨拋水國釣蓑雨貧過
長安櫻筍時唐制四月十五日自堂厨至百司厨謂之櫻筍時頭角英髦應指笑權門蹤
跡獨差池

蜀中

馬頭春向鹿頭關遠樹平蕪一望閒雪下文君沽酒市
雲藏李白讀書山江樓客恨黃梅後村落人歌紫芋間
堤月橋燈好時景漢庭無事不征蠻
夜多無雨曉生塵草色嵐光日日新蒙頂茶畦千點露
浣花牋紙一溪春楊雄宅在惟喬木杜甫臺荒絕舊鄰
却共海棠花有約數年畱滯不歸人

渚遠江清碧簟紋小桃花繞薛濤墳朱橋直指金門路
粉堞高連玉壘雲窗下斷琴翹鳳足波中濯錦散鷗羣
子規夜夜啼巴蜀不並吳鄉楚國聞

慈恩寺偶題

往事悠悠添浩嘆勞生擾擾竟何能故山歲晚不歸去
高塔晴來獨自登林下聽經秋苑鹿江邊掃葉夕陽僧
吟餘却起雙峯念曾看庵西瀑布冰

少華甘露寺

石門蘿徑與天鄰雨檜風篁遠近聞飲澗鹿喧雙派水
上樓僧踏一梯雲孤煙薄暮關城沒遠色初晴渭曲分
長憶燃香來此宿北林猿鶴舊同群

江際

杳杳漁舟破暝烟疎疎蘆葦舊江天那堪流落逢搖落
可得潛然是偶然萬頃白波迷宿鷺一林黃葉送殘蟬
兵車未息年華促早晚閒吟向滄川

蜀中春日

海棠風外獸沾巾襟袖無端惹蜀塵和暖又逢挑菜日
寂寥未是探花人不嫌蟻酒衝愁肺却憶漁蓑覆病身
何事晚來微雨後錦江春學曲江春

渚宮亂後作

鄉人來話亂離情淚滴殘陽問楚荆白社已應無故老
清江依舊遶空城高秋軍旅齊山樹昔日漁家盡野營

牢落故居灰燼後黃花綠蔓上墻生

松

下視垂楊拂路塵雙峯石上覆苔文濃霜滿徑無紅葉
晚日高枝有白雲春砌花飄僧旋掃寒溪子落鶴先聞
那堪寂寞悲風起千樹深藏李白墳

竹

宜煙宜雨又宜風拂水藏村復間松移得蕭騷從遠寺
洗來疎淨見前峯侵階蘚拆春芽迸繞徑莎微夏蔭濃
無賴杏花多意緒數枝穿翠好相容

鴈

八月悲風九月霜蓼花紅澹葦條黃石頭城下波搖影

星子灣西雲間行驚散漁家吹短笛失羣征戍鎖殘陽
故鄉聞爾亦惆悵何況扁舟非故鄉

燕

年去年來來去忙春寒煙暝渡瀟湘低飛綠岸和梅雨
亂入紅樓棟杏梁閒几硯中闕水淺落花徑裏得泥香
千言萬語無人會又逐流鶯過短墻

鷓鴣

煖戲煙蕪錦翼齊品流應得近山雞雨昏青草湖邊過
花落黃陵廟裏啼遊子乍聞征袖濕佳人纔唱翠眉低
相呼相喚湘江濶苦竹叢深春日西

谷以此詩得名
時號為鄭鷓鴣

溫處士能畫鷺鷥以四韻換之

昔年吟醉遶江籬愛把漁竿伴鷺鷥聞說小毫能縱逸
敢憑輕素寫幽奇洵浪濺牽菱蔓夏夏風披折葦枝
得向晚窗閒挂翫雪簑煙艇恨無遺

嘉陵

細雨濕萋萋人稀江日西春愁腸已斷不待子規啼

靜吟

騷雅荒涼我自安月和餘雪夜吟寒相門相客應相笑
得句勝于得好官

亂後灞上

柳絲牽水杏房紅煙岸人稀草色中日暮一行高鳥處
依稀合是望春宮

重訪黃神谷東禪者

初塵芸閣來禪閣却訪支郎是
老郎我趣轉卑師趣靜
數峯秋雪一爐香

淮上漁者

白頭波上白頭翁家逐船移
浦浦風一尺鱸魚新釣得
兒孫吹火荻花中

席上貽歌者

花月樓臺近九衢清歌一曲
倒金壺座中亦有江南客
莫向春風唱鷓鴣

淮上與友人別

楊子江頭楊柳春楊花愁殺
渡江人數聲風笛離亭晚

君向瀟湘我向秦

蜀中賞海棠

濃澹芳春滿蜀鄉半隨風雨
斷鶯腸浣花溪上堪惆悵
子美無心為發揚

杜工部居兩蜀詩
集中無海棠之題

曲江春艸

花落江堤簇暖烟雨餘艸色
遠相連香輪莫碾青青破
畱與愁人一醉眠

張喬

喬池州人有詩名咸通中與
許棠鄭谷張蠙諸人
同號十哲巢寇之亂罷舉隱
九華

鄭谷云咸通舉子乘馬喬獨
乘驢喬詩苦道真鄭

少師薰嘗延之門下亦受知於薛尚書能

近體詩

曲江春

尋春與送春多遶曲江濱一片鳧鷖水千秋輦轂塵岸
涼隨衆木波影送遊人自是遊人老年年管吹新

秋夕

春恨復秋悲秋悲難到時每逢明月夜長起故山思巷
僻行吟遠蛩多獨卧遲溪僧與樵客動別十年期

遊少華山甘露寺

少華中峯寺高秋衆景歸地連秦塞起河隔晉山微晚
木蟬相應涼天鴈並飛慙懃記巖石祇恐再來稀

滕王閣寫望

管人登覽處遺閣大江隅疊浪有時有閒雲無日無早
涼先鷺去返照後帆孤未得營歸計菱歌滿舊湖

華山

誰將倚天劍削出倚天峯衆水背流急他山相向重樹
黏青靄合崖夾白雲濃一夜盆傾雨前湫起毒龍

郢州卽事

孤城臨遠水千里見寒山白雪無人唱滄洲盡日間鳥
歸殘燒外帆出斷雲間此地秋風起應隨計吏還

江行夜雨

江風木落天游子感流年萬里波連蜀三更雨到船夢

殘燈影外愁積葦叢邊不及樵漁客全家住島田

題鄭侍御藍田別業

秋山清若水吟客靜於僧小徑通商嶺高窗見杜陵雲霞朝入鏡猿鳥夜窺燈許作前峯侶終來寄上層

送許棠下第遊蜀

天下猿多處西南是蜀關馬登青壁瘦人宿翠微閒帶雨逢殘日因江見斷山行歌風月好莫老錦城間

經隱巖舊居

夜久村落靜徘徊楊柳津青山猶有路明月已無人夢寐生前事星霜倦此身嘗期結茅處來往躡遺塵

蟬

先秋蟬一悲長是客行時曾感去年客又鳴何處枝細聽殘韻在迴望舊聲遲斷續誰家樹涼風送別離

華山

青蒼河一隅氣狀杳難圖卓傑三峯出高竒四岳無力疑擎上界勢獨壓中區衆水東西走羣山遠近趨天迴諸宿照地聳百靈扶石壁煙霞麗龍潭雨雹麓澄凝臨甸服險固束神都淺覺川原異深應日月殊鶴歸青靄合仙去白雲孤瀑溜斜飛凍松長倒掛枯每來尋洞穴不擬返江湖儻有芝田種巖間老一夫

謝公亭懷古

謝家煙徑長莓苔牢落虛攔竹上開流水不將山色去

閒雲時帶角聲來六朝舊跡遺詩在三楚空江有雁迴
達理始應惆悵盡因僧清話憶天台

題河中鸛雀樓

高樓懷古動悲歌鸛雀今無野雀過樹隔五陵秋色早
水連三晉夕陽多漁人遺火成寒燒牧笛吹風起夜波
十載重來值搖落天涯歸計欲如何

宴邊將

一曲涼州金石清邊風蕭颯動江城坐中有老沙場客
橫笛休吹塞上聲

寄山僧

閒倚蒲團向日眠不能歸老岳雲邊舊時僧侶無人在

惟有長松見少年

邵謁

謁韶州翁源人少博聞為縣吏客至今怒不措牀
逐去遂截髻著縣門發憤讀書平居如里中兒未
冠者束髮苦吟尤能工古調尋抵京師隸國學時
溫庭筠主試乃榜其詩三十餘篇以振公道已而
釋褐後赴官不知所終

徐獻忠曰邵君數奇分淺發憤苦吟雖質未盈餘
績藻乏缺要之泗石未雕終非俗品

古體詩

古樂府

對酒彈古琴絃中發新音新音不可辨十指幽怨深妾
顏不自保四時如車輪不知今夜月曾照幾時人露滴
芙蓉香銷心亦死良時無可留殘紅謝池水

寒女吟

寒女命自薄生來多賤微家貧人不聘一身無所歸養
蠶徒苦心繭熟他人絲織素徒苦力素成他人衣青樓
富家女纔生便有主終日著羅綺何曾識機杼清夜聞
歌聲聽之淚如雨他人如何歡我意又何苦所以問皇
天皇天竟無語

自歎

春蠶未成繭已賀箱籠實蟾子徒有絲終年不成疋每

念古人言有得則有失我命獨如何憔悴長如一白日
九衢中幽獨暗如漆流泉有枯時窮賤無盡日惆悵復
惆悵幾回新月出

覽鏡

一照一回悲再照顏色衰日月自流水不知身老時昨
日照紅顏今朝照白絲白絲與紅顏相去咫尺間

苦別離

十五爲君婚二十八君門自從入戶後見君長出門朝
看相送人暮看相送人若遣折楊柳此地樹無根願爲
陌上土得作馬蹄塵願爲曲木枝得作雙車輪安得太
行山移來君馬前

望行人

登樓恐不高及高君已遠雲行郎即行雲歸郎不返嗟
為樓上人望望不相近若作轍中泥不放郎車轉白日
下西山望盡妾腸斷

御定全唐詩錄卷第九十一

御定全唐詩錄卷第九十二

禮部侍郎臣徐倬翰林院侍讀學士臣徐元正奉

旨校刊

吳融

融字子華越州山陰人

融有田在長洲東百里松江傍為詩云故隱茅山西今來坐落澤溪蓋寓吳云

融力學富辭調龍紀初及進士第韋昭度討蜀表
掌書記遷侍御史坐累去官流浪荆南依成汭久
之召為左補闕以禮部郎中為翰林學士拜中書
舍人昭宗反正御南闕群臣稱賀融最先至於是
左右歡駭帝有指授疊十許藁融跪作詔少選成
語當意詳帝咨賞良厚進戶部侍郎鳳翔劫遷融

不克從去客闈鄉俄召還翰林遷承旨

古體詩

贈李長史歌

并序

余客武康縣既旬日將去邑長相餞於溪亭座
中有李長史袖出蘆管自請聲以送客且言我
業此二十年年少時五陵豪俠無不與之遊梨
園新聲一聞之明日皆出我下洎巢賊腥穢宮
闕逃難於東江淮間非吾土又無樂音敝衣旅
食雙鬢雪然風月好時或亭臯送別必引滿自
勸不能忘情一曲未終泣然承睫越烏胡馬之
感感動傷人羅進士隱初遇金陵有贈詩尚能

成誦在口余憫李之流落仰羅之所感故贈之
時光啓戊申歲清明月之八日

危欄歷溪溪澹碧翠裏紅飄鶯寂寂此日長亭愴別離
座中忽遇吹蘆客雙攘輕袖當高軒含商吐羽凌非煙
初疑一百尺瀑布八九月落香爐巔又似鮫人爲客罷
迸淚成珠玉盤瀉碧珊瑚碎震澤中金銀鐙撼龜山下
鏗訇揭調初驚人幽咽細聲還感神紫鳳將雛叫山月
元兔喪子啼江春咨嗟長史出人藝如何值此艱難際
可中長似承平基肯將此爲閒人吹不是東城射雉處
即應南苑鬪雞時白櫻桃熟每先賞紅芍藥開長有時
賣珠曾被武皇問薰香不怕賈公知今來流落一何苦

江南江北九寒暑翠華猶在橐泉中一曲梁州淚如雨
長史長史聽我語從來藝絕多失所羅君贈君兩首詩
半是悲君半自悲

李周彈箏歌

淮南韋太尉席上贈

古人云絲不如竹竹不如肉乃知此語未必然李周彈
箏聽不足聞君七歲八歲時五音六律皆生知就中十
三絃最妙應宮出入年方少青驄慣走長楸日幾度承
恩蒙召急一字雁行斜御筵鏘金戛羽凌非烟始似五
更初殘月裏淒淒切切清霜蟬又如盤石罅堆葉下冷
冷瀝瀝蒼崖泉鴻門玉斗初向地織女金梭飛上天有
時上苑繁花發有時太液秋波濶當頭獨坐縱一聲滿

座好風生拂拂天顏開聖心悅紫金白珠露賜物出來
無暇更還家且上書樓卧明月年將六十藝轉精日寫
梨園新曲聲近來一事還惆悵故里春荒煙草平供奉
且聽語自昔興衰看樂府祇如伊州與梁州盡是太平
時歌舞旦夕君王繼此聲不要停絃淚如雨

太湖石歌

洞庭山下湖波碧波中萬古生幽石鐵索千尋取得來
奇形怪狀誰能識初疑朝家正人立又如戰士方狙擊
又如防風死後骨又如於菟活時額又如成人楓又如
害癭柏雨過上停泓風來中有隙想得沉潛水府時興
雲出雨蟠蛟螭今來砒砒林庭上長恐忽然生白浪用

時應不稱媧皇將去也堪隨博望噫嘻爾石好憑依幸
有方池并釣磯小山叢桂且為伴鐘阜白雲長自歸何
必豪家甲第裡玉闌干畔爭光輝一朝荆棘忽流落何
異綺羅雲雨飛

近體詩

端居

片雨過前汀端居枕簟清病魔隨暑退詩思傷涼生別
燕殷勤語殘蟬彷彿鳴古來悲不盡况我本多情

途中

柳弱風長在雲輕雨易休不勞芳草色更惹夕陽愁萬
里獨歸去五陵無與遊春心漸傷盡何處有高樓

出潼關

重門隨地險一逕入天開華岳眼前盡黃河腳底來飛
軒何滿路丹陛正求才獨我無成者飄然又此回

途次淮口

寒流萬派碧南渡見煙光人向隋宮近山盤楚塞長有
邨皆綠暗無徑不紅芳已帶傷春病如何更異鄉

西陵夜居

寒潮落遠汀暝色入柴扃漏永沉沉靜燈孤的的青林
風移宿鳥池雨定流螢盡夜成愁絕啼蛩莫近庭

登途懷友人

日落野原秀雨餘雲物閒清時正愁絕高處更躋攀京

洛遙天外江河戰鼓間孤懷欲誰寄應付塞鴻還

題越州法華寺

寺在五峯陰穿緣一徑尋雲藏古殿暗石護小房深宿
鳥連僧定寒猿應客吟上方應見海月出試登臨

春詞

鸞鏡長侵夜鴛衾不識寒羞多轉面語妒極定睛看金
市舊居近鈿車新造寬春期莫相誤一日有花殘

卽席

家住叢臺舊名參絳圃新醉波疑奪燭嬌態欲沉春伴
雨聊過楚歸雲定占秦桃花正濃煖爭不浪迷人

出遲

圍密花藏易樓淡月到難酒虛留客盡燈暗遠更殘麝
想眉間印鴉知頂上盤文王之囿小莫惜借人看

戲作

恨極同填海情長抵導江丁香從小結蓮子徹枝雙整
髻花當檻吹燈月在窓秦臺非久計早晚降霓幢

湖州溪樓書獻鄭負外

危檻等飛檣閒追晚際涼青林上雨色白鳥破溪光目
以高須極心因靜更傷唯公舊相許早晚侍長楊

夏夜有寄

月上簾如水軒高簾在鈎竹聲寒不夏蛩思靜先秋偶
得青霄興方知白日愁所思何處遠斜漢欲低流

詠柳

自與鶯為地不教花作媒
細應和雨斷輕祇愛風裁好
拂錦步幃莫遮銅雀臺
灞陵千萬樹日暮別離回

赴闕次留獻荆南成相公三十韻

分闡兼文德持衡有武功
荆南知獨去海內更誰同
拔地孤峯秀當天一鷲雄
雲生五色筆月吐六鈞弓
骨格凌秋聳心源見底空
神清飡沆瀣氣逸飲洪濛
臨事成奇策全身仗至忠
解鞍欺李廣煮弩笑臧洪
往昔逢多難來茲故統戎
卓旗雲夢澤撲火細腰宮
鏟土樓臺構連江雉堞籠
似平鋪掌上疑湧出壺中
豈是勞人力寧因役鬼工
本遺三戶在今匝萬家
通画舸橫青雀危檣

列綵虹席飛巫峽雨袖拂宋亭風
塲廣盤毬子池閒引釣筒
禮賢金璧賤煦物雪霜融
酒滿梁塵動棊殘漏滴終
儉常資澹靜貴絕恃穹崇
唯要臣誠顯那求帝渥隆
甘棠名異奭大樹姓非馮
自念為遷客方諧謁上公
痛知遭止棘頻嘆委飄蓬
借宅誅茅綠分囷指粟紅
只慚燕館盛寧覺阮途窮
渙汗霑明主滄浪別釣翁
去曾憂塞馬歸欲逐邊鴻
積感深於海銜恩重極
嵩行行柳門路回首下離東

賦得欲曉看妝面

朧朧欲曙色隱隱辨殘妝
月始雲中出花猶霧裏藏
眉邊全失翠額畔半留黃
轉入金屏影侵角枕光
有蟬

隳髻樣無燕著釵行十二峯前夢如何不斷腸

和韓致光侍郎無題

珠佩元消暑犀簪自辟塵掩燈容燕宿開鏡待雞晨去
嬾多忘舊來多未厭新每逢憂是夢長憶故延真杏小
雙圓雁山濃兩點嚙瘦難勝寶帶輕欲馭飈輪篋鳳金
雕翼釵魚玉鏤鱗月明無睡夜花落斷腸春解舞何須
楚能箏可在秦怯探同海底稀遇極天津綠柰攀宮豔
青梅弄嶺珍管纖銀字咽梭密錦書勻厭勝還隨俗無
疑不避人可憐三五夕武媚善為隣

舞轉輕輕雪歌霏漠漠塵漫遊多卜夜慵起不知晨玉
筋和妝裏金蓮逐步新鳳笙追北里鶴馭訪南真有恨

都無語非愁亦有嚙戲應過蚌浦飛合入蟾輪杯樣成
言鳥梳文解卧鱗逢迎大堤晚離別洞庭春似玉曾誇
趙如雲不讓秦錦收花上露珠引月中津木為連理貴
禽因比翼珍萬峯酥點薄五色繡妝勻懶髓求魚客鮫
綃託海人寸腸誰與達洞府四無鄰

綺閣臨初日銅臺拂暗塵鷓鴣偏報曉烏鷓慣驚晨魚
網裁書數鷓絃上曲新病多疑厄重語切見心真子母
錢徵笑西南月借嚙擣衣嫌獨杵分袂怨雙輪貝葉教
丹觜金刀寄赤鱗捲簾吟塞雪飛楫渡江春解織宜名
蕙能歌合姓秦眼穿回雁嶺魂斷飲牛津藥自偷來絕
香從竊去珍茗煎雲沫聚藥種玉苗勻草密應迷客花

繁好避人長干足風雨遙夜與誰隣

倒次元韻

南陌來尋伴東城去卜鄰生憎無賴客死憶有情人似
束腰支細如描髮彩勻黃鸝裁帽貴紫燕刻釵珍身近
從淄右家元接觀津雨臺誰屬楚花洞不知秦淚滴空
牀冷妝濃滿鏡春枕涼欹琥珀簟潔展冰鱗茂苑廊千
步昭陽扇九輪陽城迷處笑京兆畫時噴魚子封牋短
蠅頭學字真易判期已遠難諱事還新艇子愁衝夜驪
駒怕拂晨如何斷岐路免得見行塵

箇人三十韻

嫋嫋復盈盈何年墜玉京見人還道姓羞客不稱名故

事諳金谷新居近石城臉橫秋水溢眉拂遠山晴粉薄
塗雲母簪寒蓼水晶催來兩槳送怕起五絲縈髻學盤
桓綰床依宛轉成博山凝霧重油壁隱車輕額點梅花
樣心通棘刺情搔頭邀顧遇指約到平生魚網徐徐襲
螺卮淺淺傾芙蓉褥已展荳蔻水休更趙女憐膠臉丁
娘愛燭明炷香龍薦腦辟魘虎輸睛管咽參差韻絃嘈
倭儻聲花殘春寂寂月落漏丁丁桺絮聯章敏椒花屬
思清剪羅成綵字銷蠟脫朱纓邂逅當投珮艱難莫拊
楹熨來身熱定砥得面痕平匣鏡金螭怒簾旌繡獸獰
頸長堪鶴並腰細任蜂爭滴淚泉饒竭論心石未貞必
雙成鳳去豈獨化蟬鳴書遠腸空斷樓高膽易驚數錢

紅帶結鬪草舊裾盛映柳闌干小侵波畧約橫夜愁遙
寄雁曉夢半和鶯翼祇思鷓比根長羨藕并可憐衣帶
緩休賦重行行

雪十韻

灑密蔽璇穹霏霏杳莫窮遲於雨到地疾甚絮隨風四
野蒼茫際千家晃朗中夜迷三繞鵲晝斷一行鴻結片
飛瓊樹栽花照藥宮壅應邊盡北填合海無東高愛危
峯積低愁暖氣融月鄰都浩渺日射更玲瓏送臘辭寒
律迎春入舊叢自憐曾未至聊復賦元功

賦雪十韻

雨凍輕輕下風乾淅淅吹喜勝花發處驚似客來時河

靜膠行棹崑空響折枝終無鷓鴣識先有鵲鴿知馬勢
晨爭急鷓聲晚更饑替霜嚴柏署藏月上龍墀百尺樓
堪倚千錢酒要追朝歸紫閣早漏出建章遲臘候何曾
爽春工是所資遙知故溪柳排比萬條絲

賦雪

一夜陰風度平明顯氣交未知融結判唯見混茫包路
莫藏行跡林難出樹梢氣應封獸穴險必墮禽巢影密
燈回照聲繁竹迭敲翫宜酥讓點冷稱蜜同抄結凍防
魚躍粘沙費馬跑爐寒資蕪荻屋暖賴編茅遠不分山
疊低宜失地均闌干高百尺新霽若為拋

古錦裾六韻

錦上有鸚鵡鶴
陸處士有序

濯水經何日隨風故有人綠衣猶偈畫丹頂尚迷真暗
澹雲沉古青蒼蘚剝新映襟知惹淚侵羈想縈塵掣曳
無由覩流傳久自珍武威應認得牽挽幾當春

敗簾六韻

有客編來久彌年斷不收不堪風作候豈復燕為讐盡
見三重閣難迷百尺樓伴燈微掩夢兼扇劣遮羞零落
亡珠綴殷勤謝玉鈎涼宵何必捲月自入軒流

追詠棠梨花十韻

蜀地從來勝棠梨第一花更應無軟弱別自有妍華不
貴綃為霧難降綺作霞移須歸紫府駐合餌丹砂密映
彈琴宅深藏賣酒家夜宜紅蠟照春稱錦筵遮連廟魂

棲望飄江字遶巴未饒酥點薄兼妒雪飛斜舊賞三年
斷新期萬樹賒長安如種得誰定牡丹誇

上陽宮辭

苑路青青半是苔翠華西去未知回景陽春漏無人報
太液秋波有鴈來單影可堪明月照紅顏無奈落花催
誰能賦得長門事不惜千金奉酒杯

偶書

青牛關畔寄孤村山當屏風石當門芳樹綠陰連蔽芾
長河飛浪接崑崙苔田綠後蛙爭聚麥隴黃時雀更喧
只此無心便無事避人何必武陵源

書懷

傷巖依樹結簷楹夏物蕭疎景更清灘響忽高何處雨
松陰自轉遠山晴見多隣犬遙相認來慣幽禽近不驚
爭得便誇饒勝事九衢塵裏免勞生

春晚書懷

落盡紅芳春意闌綠蕪空鑠辟疆園嫦娥斷影霜輪冷
帝子無蹤淚竹繁未達東林還絕想不勞南浦更銷魂
晚來雖共殘鶯約爭奈風淒又雨昏

偶題

賤子曾塵國士知登門倒屣憶當時西州酌盡看花酒
東閣編成詠雪詩莫道精靈無伯有尋聞任俠報爰絲
烏衣舊宅猶能認粉竹金松一兩枝

按融為韋昭度掌記受知似深韋在相位崔昭緯伎

而殺之後昭緯勢敗亦被殺於荆南韋之死類晁錯故比昭緯於爰絲方回以為感恩之言是矣獨疑為朱溫之徒則失考耳

卽事

抵鵲山前寄掩扉便甘終老脫朝衣曉窺清鏡千峯入
暮倚長松獨鶴歸雲裏引來泉脈細雨中移得藥苗肥
何須一筋鱸魚膾始挂孤帆問釣磯

秋日經別墅

別墅蕭條海上村偶期蘭菊與琴樽簷橫碧嶂秋光近
樹帶寒潮晚色昏幸有白雲眠楚客不勞芳草思王孫
北山移去前文在無復教人嘆曉猿

禁直偶書

玉皇新復五城居仙館詞臣在碧虛鈿砌看翻紅芍藥

鑠窓還詠碧蟾蜍敢期林上靈鳥語貪草雲間彩鳳書
爭奈滄洲頻入夢白波無際落紅蕖

憶釣舟

青山小隱枕潺湲一葉垂綸幾泝泐後浦春風隨興去
南塘秋雨有時眠慣衝曉霧驚羣雁愛颭殘陽入亂煙
迴首無人寄惆悵九衢塵土困揚鞭

海上秋懷

辭無珪組隱無才門向潮頭過處開幾度黃昏逢罔象
有時紅旭見蓬萊磧連荒戍頻頻火天絕纖雲往往雷
昨夜西風已搖落邗堪更上望鄉臺

東歸次瀛上

暖煙輕澹草霏霏一片晴山襯夕暉水露淺沙無客泛
樹連疎苑有鶯飛自從身與滄浪別長被春教寂寞歸
回首青門不知處向人楊柳莫依依

靈寶縣西

碧溪漱漱流殘陽晴沙兩兩眠鴛鴦柳花無賴苦多暇
蛺蝶有情長自忙千里宦遊成底事每年風景是他鄉
高歌一曲垂鞭去盡日無人識楚狂

重陽日荊州作

萬里投荒已自哀高秋寓目更徘徊濁醪任冷難辭醉
黃菊因暄却未開上國莫歸戎馬亂故人何在塞鴻來
驚時感事俱無奈不待殘陽下楚臺

春歸次金陵

春陰漠漠覆江城南國歸橈趁晚程水上驛流初過雨
樹籠堤處不離鶯跡疎冠蓋兼無夢地近鄉園自有情
更被東風動離思楊花千里雪中行

湖州晚望

鼓角迎秋晚韻長斷虹疎雨間微陽兩條溪水分頭碧
四面人家入骨涼獨鳥歸時雲鬪迥殘蟬急處日爭忙
他年若得壺中術一簇汀洲盡貯將

閒望

三點五點映山雨一枝兩枝臨水花蛺蝶狂飛掠芳草
鴛鴦穩睡翹暖沙闌下新居成別業江南舊隱是誰家

東遷西去俱無計却羨暝歸林上鴉

富春

水送山迎入富春一川如畫晚晴新雲低遠渡帆來重
潮落寒沙鳥下頻未必柳間無謝客也應花裏有秦人
巖光萬古清風在不敢停橈更問津
兩岸山花中有溪山花紅白徧高低靈源忽若乘槎到
仙洞還同採藥迷二月辛夷猶未落五更鴉舅最先啼
茶煙漁火遙看處一片人家在水西

宋玉宅

草白煙寒半野陂臨江舊宅指遺基已懷湘浦招魂事
更憶高唐說夢時穿徑早曾聞客住登牆豈復見人窺

今朝送別還經此吟斷當年幾許悲

關西驛亭即事

晚霞零落雨初收關上危欄獨悵畱千里好春聊極目
五陵無事莫回頭山猶帶雪霏霏恨柳未禁寒冉冉愁
直是無情也腸斷烏歸帆沒水空流

廢宅

風飄碧瓦雨摧垣却有鄰人爲鎖門幾樹好花閒白晝
滿庭芳草易黃昏放魚池涸蛙爭鬧棲燕梁空雀自喧
不獨淒涼眼前事咸陽一火便成原

金橋感事

太行和雪疊晴空二月春郊尚朔風飲馬早聞臨渭北

射鵬今欲過山東百年徒有伊川嘆五利寧無魏絳功
日暮長亭正愁絕哀笳一曲戍煙中

彭門用兵後經沛路

長亭一望一徘徊千里關河百戰來細柳舊營猶鎖月
祈連新塚已封苔霜凋綠野愁無際燒接黃雲慘不開
若比江南更牢落子山詞賦莫興哀

隋堤風物已淒涼堤下仍多舊戰場金簇有苔人拾得
蘆花無主鳥銜將秋聲暗促河聲急野色遙連日色黃
獨上寒城正愁絕戍鼙驚起雁行行

鐵馬雲旗夢渺茫東來無處不堪傷風吹白草人行少
月落空城鬼嘯長一自紛爭驚宇宙可憐蕭索絕烟光

曾為塞北閒遊客，遼水天山未斷腸。

太保中書令軍前新樓

韋昭度遷太保中書令
討陳敬瑄出節度蜀中

十二闌干壓錦城，半空人語落灘聲。
風流近接平津閣，氣色高含細柳營。
盡日捲簾江草綠，有時欹枕雪峯晴。
不知奉詔朝天後，誰此登臨看月明。

澆水席上獻座主侍郎

暖泉宮裏告虔回，畧避紅塵小宴開。
落絮已隨流水去，啼鶯還傍夕陽來。
草能緣岸侵羅薦，花不容枝蘸玉杯。
莫訝諸生中獨醉，感恩傷別正難裁。

富水驛東楹有人題詩

繡纓霞翼兩鴛鴦，金島銀川是故鄉。
只合雙飛便雙死，

豈悲相失與相忘，烟花夜泊紅蕖膩。
蘭渚春遊碧草芳，何事遽驚雲雨別。
秦山楚水兩乖張。

和座主尚書春日郊居

海燕初歸朔鴈回，靜眠深掩百花臺。
春蔬已為高僧掇，臘醞還因熟客開。
簷外暖絲兼絮墮，檻前輕浪帶鷗來。
謝公難避蒼生意，自古風流必上台。

憲丞裴公上洛退居有寄

瘦如仙鶴爽風篁，外却塵囂興緒長。
偶坐幾回沈皓月，閒吟是處到殘陽。
門前立使修書懶，花下留賓壓酒忙。
目斷瓊林攀不得，一重丹水抵三湘。

澗東筵上有寄

襄王席上一神仙眼色相當語不傳見了又休真似夢
坐來雖近遠於天隴禽有意猶能說江月無心也解圓
更被東風助惆悵落花時節蝶翩翩

病中宜茯苓寄李諫議

千年茯苓帶龍鱗太華峰頭得最珍金鼎燒煎雲漾粉
玉甌寒貯露含津南宮已借徵詩客內署今還託諫臣
飛檄愈風知妙手也須分藥救漳濱

寄貫休上人

別來如夢亦如雲八字微言不復聞世上浮沉應念我
筆端飛動只降君幾同江步吟秋霽更憶山房語夜分
見擬沃州尋舊約且教丹頂許為隣

送弟東歸

偶持麟筆侍金閨夢想三年在故溪祖竹定欺簷雪折
稚杉應拂棟雲齊謾勞筋力趨丹鳳可有文詞詠碧鷄
此別更無閒事囑北山高處謝猿啼

送知古上人

昔年離別浙河東多難相逢舊楚宮振錫纔尋三徑草
登船忽挂一帆風幾程村飯添盃白何處山花照衲紅
不似投荒憔悴客滄浪無際問漁翁

途中見杏花

一枝紅艷出牆頭牆外行人正獨愁長得看來猶有恨
可堪逢處更難畱林空色暝鶯先到春淺香寒蝶未遊

更憶帝鄉千萬樹澹煙籠日暗神州

杏花

粉薄紅輕揜臉羞花中占斷得風流軟非因醉都無力
凝不成歌亦自愁獨照影時臨水畔最含情處出牆頭
徘徊盡日難成別更待黃昏對酒樓

高侍御話皮博士池中白蓮因成奉呈

白玉花開綠錦池風流御史報人知看來應是雲中墮
偷去須從月下移已被亂蟬催婉婉更禁涼雨動離離
習家秋色堪圖畫只欠山公倒接羅

葉落

紅影飄來翠影微一辭林表不知歸伴愁無色烟猶在

替恨成啼露未晞若逐水流應萬里莫因風起便孤飛
楚郊千樹秋聲急日落紛紛惹客衣

子規

舉國繁華委逝川羽毛飄蕩一年年他山叫處花成血
舊苑春來草似煙雨暗不離濃綠樹月斜長弔欲明天
湘江日暮聲淒切愁殺行人歸去船

華清宮

漁陽烽火照函關玉輦忽忽下此山一曲羽衣聽不盡
至今遺恨水潺潺

山居即事

不傲南窗且採樵乾松每帶濕雲燒庖厨却得長兼味

三秀芝根五木苗

萬事翛然只有基小軒高淨簟涼時闌珊半局和微醉
花落中庭樹影移

華清宮

四郊飛雪暗雲端唯此宮中落旋乾綠樹碧簷相掩映
無人知道外邊寒

壬戌歲閏鄉寓居

六載抽毫侍禁闈不堪多病決然歸五陵年少如相問
阿對泉頭一布衣

阿對是楊伯起家僮嘗引泉灌蔬其泉至今尚在

結得茆簷瞰碧溪閒雲之外不同棲猶嫌未遠函關道
正睡剗聞報曉鷄

清溪見底露蒼苔密竹垂藤鎖不開應是仙家在溪處
夢流花片引人來

石白山頭有一僧朝無香積夜無燈近嫌俗客知蹤跡
擬向中方斷石層

憶街西所居

衡門一別夢難稀人欲歸時不得歸長憶去年寒食夜
杏花零落雨霏霏

渡淮作

紅杏花時辭漢苑黃梅雨裏上淮船雨迎花送長如此
辜負東風十四年

楚事

悲秋應亦抵傷春
屈宋當年並楚臣
何事從來好時節
只將惆悵付詞人

陳琳墓

冀州飛檄傲英雄
却把文辭事鄴宮
從道筆端由我得
九泉何面見袁公

王母廟

鸞龍一夜降崑丘
遺廟千年枕碧流
賺得武皇心力盡
忍看煙草茂陵秋

秋色

染不成乾盡未銷
霏霏拂拂又迢迢
曾從建業城邊路
蔓草寒烟鏢六朝

楊花

不鬪穠華不占紅
自飛晴野雪濛濛
百花長恨風吹落
唯有楊花獨愛風

羅鄴

鄴餘杭人與宗人隱虬齊名世稱三羅咸通中舉
進士不第歿後光化中韋莊奏追賜進士及第贈
官

詩評云羅隱才雄而疎羅鄴才清而緻

近體詩

僕射坡晚望

離人到此倍堪傷
陂水蘆花似故鄉
身事未知何日了

馬蹄惟覺到秋忙
田園牢落東歸晚
道路辛勤北去長
却羨無愁是沙鳥
雙雙相趁下斜陽

冬夕江上言事

僻居多與懶相宜
吟擁寒爐過臘時
風柳欲生陽面葉
凍梅先綻嶺頭枝
山川自小拋耕釣
骨肉無因免別離
賴有陶情一尊酒
愁中相向展愁眉

蚤發

一點燈殘魯酒醒
已攜孤劍事離程
愁看飛雪聞雞唱
獨向長空背雁行
白草近關微有路
濁河連底凍無聲
此中來往本迢遞
况是驅羸客塞城

登凌歊臺

高臺今古境長閒
因想興亡自慘顏
四海已歸新雨露
六朝空認舊江山
槎翹獨鳥沙汀畔
風遞連檣雪浪間
好是輪蹄來往便
誰人不向此躋攀

留題張逸人草堂

長懸青紫與芳枝
塵世無因免別離
馬上多於在家日
尊前堪惜少年時
關河客夢還鄉後
雨雪山程出店遲
却羨高人此中老
軒車過盡不知誰

山陽貽友人

性僻多將雲水便
山陽酒病動經年
行遲暖陌花闌馬
睡重春江雨打船
閒弄玉琴雙鶴舞
靜窺庭樹一猿懸
結茅更莫期深隱
聲價如今滿日邊

途中寄友人

秋庭悵望別君初折柳分襟十載餘相見或因中夜夢
寄來多是隔年書攜樽座外花空老垂釣江頭柳漸疎
裁得詩憑千里雁吟來寧不憶吾廬

春夕寄友人時有與歌者南北

芳徑春歸花半開碧山波暖雁初迴滿樓月色還依舊
昨夜歌聲自不來愁眼向誰零玉筋征蹄何處駐紅埃
中宵吟罷正惆悵從此蘭堂鎖綠苔

送張逸人

自說歸山人事賒素琴丹竈是生涯床頭殘藥鼠偷盡
溪上破門風擺斜石井晴垂青葛葉竹籬荒映白茅花

遙知此去應稀出獨卧晴窗夢曉霞

謝友人遺華陽巾

剪霧裁烟勝角冠來從玉洞五雲端醉宜薤葉欹斜影
穩稱菱花子細看野客愛留籠鶴髮溪翁爭乞配魚竿
真仙首飾勞相寄塵土翻慙戴去難

牡丹

落盡春紅始着花花時比屋事豪奢買栽池館恐無地
看到子孫能幾家門倚長衢攢繡轂幄籠輕日護香霞
歌鍾滿座爭歡賞官信流年鬢有華

芳草

廢苑墻南殘雨中似袍顏色正蒙茸微香暗惹遊人步

遠綠纔分鬪雉蹤三楚渡頭長恨見五侯門外却難逢
年年縱有春風便馬跡車輪一萬重

聞杜鵑

花時一宿碧山前明月東風叫杜鵑孤館覺來聽夜半
羸僮相對亦無眠汝身哀怨猶如此我淚縱橫豈偶然
爭得蒼蒼知有恨汝身成鶴我成仙

秋別

別路垂楊柳秋風淒管絃青樓君去後明月為誰圓

宮中

芳草長含玉輦塵君王遊幸此中頻今朝別有承恩處
鸚鵡飛來說似人

公子行

雕鞍玉勒照花明過後香風特地生半醉五侯門裏出
月高猶在禁街行

秋怨

夢斷南窗啼曉鳥新霜昨夜下庭梧不知簾外如珪月
還照邊城到曉無

春遊鬱然有懷賦

芳草和煙暖更青閑門要路一時生年年點檢人間事
唯有春風不世情

黃河曉渡

大河平野正窮秋羸馬羸僮古渡頭昨夜蓮花峯下月

隔簾相伴到明愁

吳王古宮井

古宮荒井會平後見說畊人又鑿開拾得玉釵鐫勅字
當時恩澤賜誰來
含青薜荔隨金甃碧砌磷磷生綠苔莫言數尺無波水
曾與如花並照來

望仙

千金壘土望三山雲鶴無蹤羽衛還若說神仙求便得
茂陵何事在人間

陳宮

白玉尊前紫桂香迎春閣上燕雙雙陳王半醉貴妃舞

不覺隋兵夜渡江

歎平泉春

生前幾到此亭臺尋歎投荒去不回若使春風會人意
花枝盡合向南開

為人感贈

歌舞從來最得名如今老寄洛陽城當時醉送龍驤曲
畱與誰家唱月明

梅花

繁如瑞雪壑枝開越嶺吳溪免用栽却是五侯家未識
春風不放過江來

柳絮

處處東風撲晚楊
輕輕醉粉落無香
就中堪恨隋堤上
曾惹龍舟舞鳳凰

鷄冠花

一枝濃艷對秋光
露滴風搖倚砌傍
曉景乍看何處似
謝家新染紫羅囊

放鷓鴣

好倚青山與碧溪
刺桐毛竹待雙棲
花時遷客傷離別
莫向相思樹上啼

螢

水殿清風玉戶開
飛光千點去還來
無風無月長門夜
偏到堦前照綠苔

御定全唐詩錄卷第九十二

欽定四庫全書

